

Renghta Raja aro Chimite

Rev.Paramsingh M.Sangma, Pastor - Nogorpara Baptist Church

Mail add: paramrev@gmail.com

Website: nogorparabc.org.

Aganchengani:

A·chik jatoni mingsinggipa dilgiparango mandera·aniko man·pagiparang dong·a, indiba namen rasong gribee Renghta Raja watchangako man·gipa ong·a ine aganchimoba gualni dong·jawakon. Maina ua saksa jatna a·songna dakgrikchakgipa aro a·song-chigani namroro-silroroanina kamko ka·pagenoba uko seanirango aro dingtangmancha mandera·anina mamingkon jat gita dakujaenga. Da·alonaba uni dakanggin kamrang manderang bangbea patiani aro a·song mikkim rasongko ra·baaha. Uarangoni A·chik a·songni saliram jolo adita mingsinggipa pokkrirango gnang jerangkon ua Garo Raja kittaha, uarangoni dalbatgipa Chimite pokkri, aro gipin pokkrirang, Kodaldhowa, Rangdokram, aro Raja bill ba Tal pokkri ong·a.

Chimite pokkri uan dalbatgipa pokkri ong·a, uan nitobegipa rona an·sengbegipa biap A·chik a·songni saliramchi Nogorpara songo donggipa bigha 80 batgipa pokri ong·a. Uni sepangon Bangladesh Border niwate balwa balsri balao salni napangako nigame rona an·sengbegipa Dorga ba Na·katchini gopram gnang. Iandake nitobegipa biaprangko mitamrang nikujaenga aro nikna gitaba uarangni gimin name ki·taprang poraimankujaengani gimin ma·sianirang aro uarangko gamchate ra·anirangba namen komikuenga. Unigimin anga adita bilsirangna Renghta Raja aro Chimiteni gimin name serikarang dong·jaoba jerangko an·tangni am·sandie man·paa, uarangko mikkangchina ja·kusa ga·jitchenggipa gita anga iano segatchengna namnikbea. Bangbea manderang ia pokkrini gimin sing·anirango dakenga indiba namgipa aganchaniko man·skajaenga, maina namgipa sakkirang baksa serikanirang dong·ja. Skangni pagitchamrang dingtang dingtang dake agananirango daka, indiba sakantini agananirangon mamingba ong·chongmotgipa itihis baksa nangrimgriknide dong·ja bangbatan bilding bildang dakaia. Unigimin anga chu·sokgipa seaniko sena man·janchimoba, angni am·sandie jerangko banonikoba mingsa bachinikoba mingsa ra·kolame man·aoniko dong·sranjijana bate nambatkugen ine sena gisikoni katchabea.

Renghta Raja:

Pokriko man·e cha·gipa A·chik mande tangka paisa, Sona-Rupa aro Hira-Mukta banggipa aro chengo Raja Uphadi-ko man·gipa A·chik raja ia Pokkriko kittaha ine pagitchamrangoni jedake Lt.Sonaram K.Sangma, Lt.Changaram Ch.Marak, Lt.Greaterson K.Sangma aro Pa.Evenson K.Sangma uamangni lekka bitchito serikanirango nika. I.M.Simon uni seanio Chimite pokkriko Renghta Garo Raja kittaha ine uaba janapaha¹. Renghta Rajani golpoara aganritingbagipa golposan ong·ja indiba Assamni Itihis-o aro Indiani gimin British manderangni serikanirangoba bilsi baksa seani aro janapanirang dong·a, unigimin indakgipa sakkirangchi mingsinggipa A·chik raja ba Garo Rajani Itihis ong·chongmotgipa golpoan ine nika aro ua rajasa ua nitobegipa pokri Chimiteko cho·aha.

Renghta Raja saksa namen bilak wasagipa man·e chabegipa aro namen mingsinggipa bilko man·gipa Garo Raja ong·a (A powerful Garo Chieftain nicknamed Renghta).² Renghta ba Lengti rajani atchiani aro maa paako chong·motko name u·ijaoba pilak seriknairango nigrike Mir Jhumla baksa dakgrikni bilsirang aro John Elliotni A·chik a·songona re·baani bilsirango hisabe ua 1620-oni 1630 bilsirangni gisep mango A·chik a·songni saliram jolo atchiaha. 1584 bilsio Mughalrang Cooch Beharni rajako am·srangha aro uamangni kosako ua songjolo sason ka·na aro kajinarango chimongchina Zaminder-rangko don·aha ine Mihir N.Sangma uni segipa ki·tap “Unpublished Documents on Garo Affairs”-o janapaha³. Aro A Playfair-ni segipa “The Garos” seanio 1655 bilsio Mir Jhumla Aurangzeb Mughal rajani saksa kotokko dilgipa Assamko amaha, unon Abrasen Garo rajaba uni ning·o bame on·aha⁴. Unigimin ia bilsirango hisabe uni atchiani ua bilsirango ong·na nanga.

¹ I.M.Simon, eds., “Meghalaya District Gazetteer, Garo Hills Districts,” (Delhi: Directorate of Arts & Culture District Gazetteers, 1996), pp.21.

² Mihir N.Sangma, “Unpublished Documents on Garo Affairs”, (New Delhi: Scholar Publishing House, 1993), pp.24.

³ A Playfair, “The Garos”, (London: Nutt, 1909), pp.11.

⁴ A Playfair, “The Garos”, (London: Nutt, 1909), pp.11.

A·chik Baptist Garobadha Mondoli, Silver Jubilee 2013-ni Souvenir-o Mrs.Mrinaloy K.Sangma-ni segipa article, “Garobadha Songni ong·baani,”-o janapani gitade Renghta rajaba ua somoirangon A·chik a·songni saliram jolo saksa bilak wasagipa raja saksa ong·e Koch Raja Pran Narayanni dakchakaniko ra·e Mir Jhumlako dakgriksoahachim indiba am·chakjae bame on·aha⁵. A·chik rajarangoni mitamrang Mughal aro Ahomni rajani sason ka·mittingo uamang baksa nangrimaniko dakaha.⁶ Renghta rajaba saksa A·chik a·songni saliram jolni niksenggipa Garo raja ong·pae nangrimpilaniko dakna banga gamrangko, nokkol chakolrangko aro uamangni noa·namchik madrang·mahariko on·esa nangrimgrikaniko dakna nangaha. Unon zaminder·rangni A·chik jatko sinjetaoniko nina nimatjae chako chaktojae jattang a·songtangko jokatna ua rakbee warachakanirangko dakaha, a·kaweona ong·onnange sko so·ote bobil ginal rike a·jak sokanirangko dakaha. Renghta raja ka·dongipa aro maming bobil ginalni silchi·darena misilgija jatna a·songna warachakgipa milam goringranggipa rama budu tetgipa jatni matgrikan ong·a.⁷

Renghta Rajani kattarangara golpoara A·chik jatni Itihas ong·genoba da·on dipet darang A·chik ki·tap segiparang iarangko name am·sandiani aro serik jotrikanirang dong·kujaenga. Gipinrangni serikaonikosa poraiskae jattangni ong·chongmota Itihasko am·sandina nangkuenga. Renghta rajani golpoko da·oni chadamberang sawa maidakgipa ong·achim u·itokjaha, mitamrangde uan aganrittinggipa golpo gitasan chanchitokengaha, mitamrangde ua raja dong·chongmotama inesa sing·engaha. Sawa mande apako gualgipa, amako u·igijagipa dong·achim, apatangko u·igijagipa amatangko sandigijagipa, nokaptangko ma·sigijagipa, a·jatango ma·branggipa jawani sinchepako man·a aro basakoba an·tangni man·rikaniko gimaataona soka.

Renghta Raja A·chik Jatni Aski Rongsa:

A·chikrangni gisepo bading chiwalani kamko darangba ua chasongo jumangba nikjachim aro u·ie ma·sianiba dong·kujaengachim. Renghta raja saksa namen man·e chabegipa aro bil gnanggipa A·chik saliram magitchako niksenggipa mande ong·a⁸, uni sason ka·na bil man·aniko Britishrangni A·chik a·songona napaona kingking maming Britishrang baksa nanggrikan grian tom·tome bading·chiwalaniko dakdilgipa raja ong·a. Uko A·chik jat gita chasongna maming mandera·ani dakani dong·kuja aro singsandianirangko dakuja. Ua darangni galchipgimin gita ia chasongona kingking ong·genchimoba jattangni ma·ringako man·pajaoba jatna a·songna an·tangko on·kange jatni dalgnina a·songni silgnina kamko ka·gipa gisik mikasalgipa aro jatna an·tangni danil gita an·pachakgipa saksa ong·achim. Ua bading chiwalani kamko a·bachengdilgipa aro rama mesokdilgipaba ong·a ine John Elliot English mande 1788 bilsio A·chik jatni gimin amsandichenggipani seanirango nika. Ua saksa jatna chelchakgipa aro darang gipin jatni sasonni ning·o dong·na sikjachim. John Elliotni serikanirango pangchake adita manderang seahaoba darangba A·chik jatskaoni Renghta rajani gimin seanirang dong·kuja, unigimin daalona kingking uni kamrang jatna a·songna ong·genchimoba darangba uni bimingko minganirang dong·kuja. Ua aski rongsa chatbegipa aramchi pindape don·ako man·engani gimin darangba ua askiko nikatna chol man·jaenga.

Renghta Raja Zaminder·rangni jatko sinjetani aro bazaar anti·rangona re·angmittingo ong·gija dake kalstapanirangna warachakanio, aro A·chik jatni pilak pala simanirangko dam on·chipe ra·draanirangna dakgrikchake baditaba chang ua jatni gimin patoko donatako man·aha.⁹ Ua somoirangoba Zaminder·ni manderang a·brini manderang chongmotan A·chik me·chik bi·sarangko kalake on·chepe mikchepe skatang dakanirangko chelchakna uni skanirangko nika aro A·chikrangni pala simanirangko joljol East India Company baksa palna aro srena man·a gita English manderangba uko jakgitelgipa Zaminder dakna namnike ra·chakaha¹⁰. Zaminder·rangni A·chik jatko kalstapani aro me·chikrangni kosako ong·gija dake dakdraanirang namen chaktogijaniba ong·ani gimin changsao Nokma saksani jikgipa Sujani minggipaba Zaminder·rangni uamangni kosako ong·gija dake sinjetanirangko John Elliotna mikchi baksa grape grape English manderang uamangko naljokatchina molmolbeaha.¹¹ Renghta ua pilak neng·nikani aro an·tangni maa·noa, anu·namchikrangni saknaaniko naljokatna kam ka·gipa, rama dilgipa budu tetgipa ong·achim. Jattangna patok napgipa, ma·noktangna jak de·gipa, a·song·chigana namroro silrooanina a·doktango man·gipa chigatango nanggipa bolam·boltena uko pala sima, jawani anti·akingo dam dokchepana warachakgipa jatni pagipan ong·achim. A·chik a·songni kil (cotton) London·o namen dam rakbatgipa

⁵Mrs.M.K.Sangma, “Garobadha Songni ong·baani” in Souvenir “A·chik Baptist Garobadha Mondoli, Silver Jubilee 2013”, pp.11.

⁶Krickwin C.Marak, “A·chik Jat aro Kristian Missionary”, (New Delhi:Glory Graphics Pvt.Ltd,2017), pp.60

⁷J.B.Bhattacharjee, “The Garos and the English, 1765-1874”, (New Delhi: Radiant Publishers, 1978), pp.31.

⁸J.B.Bhattacharjee, “The Garos and the English, 1765-1874”, (New Delhi: Radiant Publishers, 1978), pp.45

⁹J.B.Bhattacharjee, “The Garos and the English, 1765-1874”, (New Delhi: Radiant Publishers, 1978), pp.37.

¹⁰J.B.Bhattacharjee, “The Garos and the English, 1765-1874”, (New Delhi: Radiant Publishers,1978), pp.37.

¹¹J.B.Bhattacharjee, “The Garos and the English, 1765-1874”, (New Delhi: Radiant Publishers, 1978), pp.37.

ong·ani Bengalirang uaranko A·chikrangoniko namen dam komibee bree uko English manderangnade dam rakbee palskae namen uamang laprangko man·beaha. A·chikrang a·doktangni a·mittimni bitchriko jawanasa indake pakgalaha, chigatangni bolam bolteni su·uaniko jawanasa an·tangtangde cha·gisepe akgale on·aha; apani amani noa·abirangni jakmani kramchi rangduriko jawani jolongao siksepataiaha. Iarang pilako nikmatjae chako chaktojaen Renghta raja a·dokna ilgrikgipa, chigana sangsanggipa, ma·nokgipa grikgipa, jatna jaktong de·gipa jatni matgrikan ong·a. Maming Britishrangni serikanio Renghtani maming gipin gun aro sason ka·anirangko rongtale serikani dong·jaoba saliram jolni jadila·me·aparangni aganani gitade Renghta raja mite mande dakgipa ong·a.

Uni sason ka·aniara A·chikrangko Zaminderangni on·chepaniko aro kragija dake an·tangtangni labnasan dake cha·bokanirangoniko jatna chelchakgipa, aro nambata bading·chiwalaniko English manderang baksa A·chikrangni gisepo a·bachengatgipa ong·a. Renghta Raja jatna ka·sagipa aro chanchie dakgipa aro jatna an·tangko on·kange dakgrikchakgipa ong·a, basakoba ua Bangali Zaminder·rangchi ong·gija dake sinjetni aro neng·nikatanirangko man·aha.¹² Walter Hamilton, uni seanio Renghta namen man·e·cha·begipa raja ong·a (great wealth in slaves, brass pot, and human skulls). Uni siani jamano uni pilak gam·jin mal matarangko uni depante Agund man·rikaha. Renghta Raja A·chik jatni aski rong·sa ong·a, jean chasongtango jatni silchidare a·songna anpakchakgipa ong·aha.¹³

Uni Bimung aro Kamrang:

Renghta Raja jekon Englishrangni serikanirango ‘Renghta’ raja ine seaha¹⁴, indiba A·chik jatskarangoni mitamrang uko pagla raja ineba agantoka. Maina uko pagla bimingko don·aha name agananirangde dong·ja, mitamrangni agananide ua a·kaweni jolni Bangal rori·rangni matchu mate ba uandake wak do·bokrangkoba rim·bae doke cha·aiachim unaba pagla dakaia inesa Pagla Raja mingaha. Uni sason ka·na bil man·anira Jogigopa joloni Mymensing jolrangonan ong·ani gimin Nogil anti·ba Renghta rajani ning·on ong·a. Ua bazaar·ona a·bri jolni palna simna re·bagiparangoniko kajinako ra·engon ua tangkani pal me·chikrangkoba ra·a ine Garobadha jolni pagitchamrang agantoka. Me·chik oko donggiparangko kajina·na tangka dong·jaode tangka minoka ineba ok ra·prake niaha, aro ian namen misilgipa kam ong·a aro uko jattang a·songtangni manderangba namniktokjae uko so·otna chanchie kam ka·aha.¹⁵ Indiba namedake am·sandie niode ua pilak ka·namgijagipa kamrangko Mahendranarayan·ni sipairangsa dakahaoba Renghta Raja anti·angsilrangko ra·dilna drae don·ahani gimin manderangde ukosa Pagla Raja bimingko don·aiaha.

Renghta Raja ine bimingko don·aniara uo bi·sa deme·chik dongjaani gimin Raja duk ong·beani aro mama·rik chanchianirang gapaiachim, sal wal chanchisime, cha·na·ringna aro ganding·chindingna simsakgija dake Lengota bikari ba Lengti ganari dongaiani giminsa uko Renghta Raja ine manderang uko aganaha. Minggipin uko pagla raja inaniara ua noko bi·sa deme·chik dong·jani gimin gisiko sosojengjeng ong·e skatang dakanirangba dong·aha. Aro minggipin dake agananirangko knaani gitade uni nokdango deme·chik dong·gijanio dingtang dingtang chanchianioba ua me·chik oko dong·giparangko ok·ko ra·prake niani aselrangba ong·ahama.

Mongsongbate uko bangbata changon Mahendranarayan Choudhury Karaibarini zaminder kajina gile ra·anggiparangkoba chu·ongnikjae uko sinjetanirangko dakaha. Mahendranarayan Karaibarini Zaminder·na Renghta Raja uni deme·chik Ganje minggipa nitobegipa me·tra saksako on·aha ine Shri·Shyam Jaganathan, IAS Ampati Civil Sub·Division·ni SDO uni Ampati Subdivision·ni gimin segipa “Ampati” ingipa ki·tapo seaha¹⁶. Indiba angni atchu Pa·Sonaram K·Sangma·ni seanio nikani gitade Ganje randi me·chik Na·katchini deme·chik Bingka chiring rikkamo songdong·a·chagipa inesa janapska.¹⁷ Maina Renghta Rajao deme·chik dong·jaani aselan uni nokdango kusini dong·ja aro uni giminsa ua an·tangni bimingko tangatna pokrirangko kitaha ine janapanirang aro seanirang gnanng.

Uko pagla raja ine bimingko on·ani aselrangde ua indita Zaminder·rangni sinjetani asel be·en gisik aro pilakni gitan saknaaniko man·beaha aro chanchina changpiljaha. Uarangni aselba ua sko tik ong·piljahakon ine nika, aro uni aselsa skatang bazaar·rango antirango kajinarangko ra·chaksoengon manderangoniko drae

¹² J.B.Battacharjee, “The Garo and the English 1765-1874”, (New Delhi: Radiant Publishers, 1978), pp.31.

¹³ Walter Hamilton, ‘A Geographical, Stastical, and Historical Description of Hindostan, vol.II,’ pp.758.

¹⁴ J.B.Batacharjee, “The Garos and the English, 1765-1874”, (New Delhi: Radiant Publishers, 1989), pp.37.

¹⁵ Mrinaloy K.Sangma, “Garobadha Songni ong·baani” in Souvenir A·chik Baptist Garobadha Mondoli, Silver Jubilee 2013, pp.11.

¹⁶ Shyam Jaganathan, “Ampati”, (Tura: Alva B.Sangma, The Narayan Group Limited, 2002), pp.118.

¹⁷ Sonaram K.Sangma, “Lengtia Raja”, Manuscript.

dakanirangba dong-aha. Mitamrang uko skatang dakaigipa aro an-tangni namnika gita jakgitele dong-na namnikgipa ong-a, sakgipinni ning-o dong-na sikjaani gimin unasa manderang uko pagla raja ine ming-aha. Renghta Raja Purana Putimariona anti-ona palna simna aro srena re-bagiparagoniko bostuni pal Nomil metrakosa anti-angsil ra-ahana.¹⁸ Uarangni gimin angni am-sandiano nikani gitade Garorangni kajina gamaniko Zaminder-rang mamingdakeba chu-ongnikjachim, aro uamangko ong-gija dake sinjetanirangkoba dakachim. Mommee minggipa Nokmani jikgipa saksa Zaminder-rang kajinako chu-ongne on-ja ine uamangko ong-gija dake sinjetanirangko (Oppression) dakani gimin uamangna chelchakaniko on-china ine grape John Elliot-o molmolanirangko uni British Government-na seatskaah.¹⁹ Uandakgipa sakkirango pangchake Renghta Rajani neng-skimani aro chaktogija chake janggi tangani obostao haida ua an-tangni noa-namchik aro madrang-maharirangko rimdrae saldrae on-na nanganirangonaba sokaha. Uni chaktogija janggi tanganio indake dakdraa rimdraanirangna uko manderang pagla raja ine bimingko mingaha.

Renghta rajani saliram jolo songdong achaani gimin biap manchako ma-sina man-jaoba uni songdong achaani saliram jolan ong-a aditan sakirang gnan, maina saliram joloni gimin pilak seanirangon Renghta rajani bimingrande dong-chaprongaia. Mingsa aselara A-chik manderang biap damsanon pangna jolna song-donkamaigipaba ong-ja, mi misi a-ba a-kango geo gamoba namjahaode biap gipinchi jitoroe songdong a-chagipasan ong-a. Unigimin Renghtani dong-ramkoba dingtang dingtang biaprango uni songdonganiko agananirang dong-a. Uni songdong-a-chaani sakirang name dong-jaoba ua Nogorpara joloba dong-kamjaoba ua badiaba somoirangode dong-aha ine sakirang gnan, maina Chimiteni saliram salgipengchipak dong-gipa a-brio nok rikani 'a-asan gitcam' (old bricks) rangko da-oba nikengkua.²⁰ Ua apsan a-asanrangko Chimiteni noksik ge-brio chiona dakon nanggipa jangkirango (steps) gadang gadang dake jakkalaniko nika. Pagitchamrangni aganani gitade ua a-brioni skangde puja ka-anirango kosako donge dud ba dingtang dingtang on-anirangko on-e dud ruaton chimiteonaba ua dudranga jokonbae chio naljokeachim.²¹ Nogorpara Mondoli Chimiteni salaramchipak pokri damsako 2008 bilsio chu-atmittingoba pel 80 mang gitcam paisarangko aro gitcam jakkalani me-dik samdikrangko man-aha.

Renghta Raja aro Zaminder-rang:

Bengali aro mongsongbate Zaminder-rang Garorangko pilakni gitan on-chepe sinchipe janggi tanganirango, mongsongbate anti-bazar-rango palani simanirango namen Garorangko onai ka-beanirangan gapachim. Uandakgipa chonike kalstape cha-bokanirango Renghta raja jatna a-songna chelchakgipa bobil ginalko wapachakgipa aro a-songna jatna an-tangko on-kange warachaksogipan ong-a. Uko mingsing mingamanirang aro uni sasonni bilni apalanirang Sherpur aro Karaibari jolrango ong-bataha. Ia Garo raja a-gilsak gimikni niksenggipa East India company baksa 18th gipa ritcha bilsirango bading-chiwalanio man-e-cha-begipa 1779 ba 1790 mangon kil (cotton)-ko bading chiwalgrikaniko a-bachengatgipa ong-aha.

Ua chasongo Zaminder-rangni Jugighopa-uni a-bachenge Mymensing aro Serpur jolrangona niksenggiparagara, Dhruvanayaran Choudhury Karaibarini zaminder, Ramram Choudhury Mechaparani zaminder ong-achim. Ramram Choudhury Garo nokmarangko drae kilrangko dam on-chepe breaniko dakna a-bachengaha, jemangan uamangni namnika aro nangnikani gita dakjaha uamangko bichal ka-na aro sastirangkoba on-e drae dakanirangkoba dakaha. Dhruvanarayan Choudhury depante Dharmanarayan Choudhury namjabate sinjetaniko dakataha, aro bon-kame mongsongbate gipin Zaminder-rangna bateba jensomoio Mahendranarayan zaminder ong-rikaha uan Garorangko namjabate on-chepaniko aro kanamgija dakanirangko dakbaaha.

Zaminder-rangni Garorangko an-tangtangni man-gnini gimin chonike kalstape onai ka-e sinjetanirangko on-on darangba ua somoio chelchakgipa aro warachakgipa saliram jolo Renghta rajana agre darang gipin Garo Nokma rajarang dong-pajachim. Renghta raja Mahendranarayan-ni ning-o an-tangko aro an-tangni manderangko on-chepna on-jahaon bangbata somoirango dakgrik ding-grikanirang ong-beaha.²² Renghta raja maia machong jatchi katchi maiachim u-ina man-jaha, maina pilak serikanirangon uko Renghta raja ba pagla raja inesan janaprongaiaha. Uko pagla donani a-selrangde haida dakna ingipakode jekoba maming misilani dong-gija dakaiani giminsama ba Mahendranarayan Choudhury Mymensing anti-bazar-ona

¹⁸ Interviewed Mrs.Mrinaloy K.Sangma, Retired Garobadha Deficit Secondary School on August 08th, 2019 at 5:45 pm.

¹⁹ John Elliot, "Observation on the Inhabitants of the Garrow Hills made during a public deputation in the years 1788 and 1789", Asiatic Research, Vol.III.page.33.

²⁰ K Chattopadhyay, Tribal Institutional of Meghalaya, J.B.Bhattacharjee, ..., pp.249.

²¹ Sonaram K.Sangma, "Lengtia Raja", Manuscript.

²² J.B.Bhattacharjee, "The Garo and the English 1765-1874", (New Delhi: Radiant Publishers, 1978), pp.32.

Garorangko kilko palna ra·angna on·jahaoba Renghta raja jatangko ua anti-akingona rimangdilaiaha, aro pala simanirangko dakbaan baksa nanga bostu kari nakkam aro pilak jakkalani bosturangkon bree ra·badilrongaiaha.²³

Zaminder-rang anti-bazaar (Hat)-rangko kulie Bengali bading-chiwalgiparangna a·kawerango on·roroaniko dakaha, maina Garo-rang pilak me·su·samjakrangko brena nangjahaoba, gana·chinanina, nakkam·karina, ate·gitche·na anti·aking re·na nangaiachim. Garo-rang kajina bangbata somoirangon tangka paisako on·ani pal bosturangkososa Zaminder-rangna on·na nangbataia, maina uamang tangka paisarangkode bange man·rongbreja. Zaminder-rang anti·aking ba bazaar-rangko kulie on·ahaon ua anti-rango Barkandaze-rangko (policerang) rakkie don·rongaha jedakode anti-bazar-o mamingba neng·nikani dong·mangija sason ka·na man·gen. Bangalee bading-chiwalgiparangba Barkandaze aro policerangni dormahana Zaminder-rangna kajina gam·na nangahani gimin Garo-rangonikosa bangbearangko togie aro cha·boke ra·angrongaha. Garo-rang indakgipa togianirang aro cha·bokanirangkoba mamingkoba u·irongpajae bangbata somoion kil (Cotton)-rangko kokchengni kokcheng olbaahaoba, dingtangmancha Zaminder-rangna kajinani pal kokchengsade agitchae olbana nangaiaha.

Renghta Rajani Britishrang Baksa Ka·rimanirang:

Englishrang a·bachengode iarangni gimin ma·sipaja aro u·ipajachim, unigimin jerangko Garo-rangni gimin Zaminder-rang agangenchim uarangkon knatime Garo-rangni bobil dakanirangko ka·namgijani kamrang ba ka·namgijagipa jat inesan chanchiaiaha. Zaminder-rang ia cholko ra·e Garo-rangni kosako bangbea sinjetanirangko dingtang dingtang cholrangchi on·beaha. Uaransan ong·aigija Garo-rangni ka·namgija dake uamangko ajak sokanirangko chempengna a·kawe jolrango dong·gipa Nokmarangni gisikko salna gita dingtang dingtang mikbokatanani aro cha·chipile on·anirangko dakaha, jedakode Garoskarangan Zaminder-rangnaba chakeming chelchakanirangko on·genchim.

British-rang Jagighopa-o bading chiwalaniko dakna a·bachengaha, aro Garo-rangni bangbea a·brini bosturangko anti-bazar-rango nikna man·aha. Paul Richard Pearkes jean Patnao karkana-rangni dilgipa ong·achim, ua 1759 bilsio Jagighopao karkanako a·bachengataha jenan bangbea Europe a·songoni bading-chiwalna re·bagiparang namen gisiko nangatako man·aha. Unon Mir Kasim Bengalni Nawab East India Company-ni kosako badi ka·aha, maina jensomoio uamang Britishrang baksa bading-chiwalanirangko dakanio segrik jotgrikanirang gita ong·jae, Assam, Rangamati, aro Karaibari jolrango Mughalrangna bilsiprakon komigija Rs.40,000 mang noksan ong·anirangko ra·baaha.²⁴

A·chikrangni zaminder-rangni dokkol ka·e bangbea sinjetaniko man·beani gimin uamangko a·jak sokanide a·kawe jolrangona re·ange bangakon sko sotanian ong·aiachim, uamang sko sotanio chu·sokahaode re·bapile madrang-badranrangko, noksul nokripenrangko okamchimongtokachim aro sko sote man·bagiminrangko galbrake uko duultoke chuchi uarangko ru·dape aro cha·anirangko galdape unon uamang doke chike cha·a ringanirangko dakachim. Cha·e ring·e matchotosa skorangko a·ao dapchenge don·a aro skoni be·enrang sujrangahaosa uarangko otdrapile sko bikrokrarako chichie dokroke sko sotgipa nokrangona ra·ange rasongna mikkimna matgrikn bilko to·susana jri jri dake kadingdie rengsi sike don·achim.

East India Company 1765 bilsio pilak bading-chiwalani aro pala-simanirangko Rangpur-o a·bachengataha,²⁵ uni jamano 1766 bilsio British East India Company Assam aro Bengaloni bading-chiwalani bilko ra·na a·bachengaha.²⁶ Garo-rangna ka·saninggija jakkalgipa Zaminder-rangni gisepo Mahendranarayan Choudhury Karaibari-ni zaminder ong·bataiachim. Ua A·chikrangna mangnamgija aro ka·saninggija dake pangnan dakrongaha, mamingba dos donggijagipa manderangkoba sasti on·e kalstape ro·rongaiachim. Ua Phulbari, Belbari, Singimari, Bagergaon, Garobadha, aro indaken dingtang dingtang biaprango chelchakani nokrangko rike uarango sipairangko biap damprakon don·tokaha.²⁷ Mahendranarayan mikbokragkipa gita gipin zaminder-rangoniko ra·sekna sikani aro dakteanirang gapaiachim. Ua a·brini manderangko ka·saninggija jakkala, aro bangbata somoion bazaar ba anti aking re·anirangoba duk ba sinjetanirangko

²³ J.B.Battacharjee, "The Garo and the English 1765-1874", (New Delhi: Radiant Publishers, 1978), pp.32.

²⁴ J.B.Bhattacharjee, "The Garo and the British, 1765-1874", (New Delhi:Radiant Publishers, 1978), pp.27.

²⁵ B.C.Allen, E.A.Gait, C.G.H Allen, H.F.Howard, "Gazetteer of Bengal and North East India", (New Delhi: Mittal Publications, rep.2005), pp.263.

²⁶ Mihir N.Sangma, "Unpublished Documents on Garo Affairs" (New Delhi:Scholar Publishing House, 1993),pp.24.

²⁷ J.B.Battacharjee, "The Garo and the English 1765-1874", (New Delhi: Radiant Publishers, 1978), pp.31.

on-rongaha, ua Sherpur aro Susung jolni zaminder skarang baksaba pangnan nanggrikrongaiachim. Maina zaminder-rangni Garo-rangko nangnikanide uamangni man·gnini giminsan ong·bataiachim. Zaminder-rangni ka·saningija aro ka·namgija dake Garorangni kosako sinjete bading-chiwalanirangko dake neng·nikaniko on·aniko British East India Company-ni manderang u·iaha. Ia neng·nikanirangko name am·sandie kamko ka·china Calcuttaoni September 1788 bilsio Dacca-ni Commissioner Mr.John Elliotko unomittingo Governor General in Council, Lord Cornwallis watataha.²⁸

John Elliot saliram Garo a·songrangona re·bae Zaminder-rang aro Garo dilgiparang baksaba kamko ka·chakataha, nangbregijagipa anti-bazar-rangko don·tongataha aro uarango gimaanina Zaminder-rangnaba British-rang gamaaha, aro Garo rajarangnaba gamchatgipa chola bararangko ra·bae on·pilskaaniko dakaha. 1788 bilsio Shepur-o Jayanarayan Choudhury aro Mahendranarayan Choudhury Karaibario Zaminder ong·engmittingo John Elliot Britishrangoni skanggipa ong·e Garorangni songona re·bae grongechenggipa ong·aha.²⁹ Elliot Garo songrangona an·tangan re·roroe bangbea Zaminder-rangni kalstape aro drae dakanirangko nikaha. Changsao Mahendranarayan Choudhury Renghta rajani Sherpur anti-bazar-oni re·bapilmittingoba rime patoko don·aha, Elliotsa Garo rajako jokataha.³⁰ British Government-ni chelchakanioba Renghta Raja a·songtangko Zaminder-rangni sinjetaoniko naljokatna on·kange kam ka·aha.

Renghta Raja Bengali Zaminder-rangni kosako Dakgrikani:

A·chikrang zaminder-rangni dokkol ka·e bangbea sinjetaniko man·beani gimin uamangko a·jak sokanide a·kawe jolrangona re·ange bangakon sko sotanian ong·aiachim. Uamang sko sotanio chu·sokahaode re·bapile madrang-badranrangko, noksul nokripengrangko okamchimongtokachim aro sko sote man·bagiminrangko galbrake uko duultoke chuchi uarango ru·dape aro cha·anirangko galdape unon uamang doke chike cha·a ringanirangko dakachim. Cha·e ring·e matchotosa skorangko a·ao dapchenge don·a aro skoni be·enrang sujrongahaosa uarango otdrapile sko bikrokrarako chichie dokroke sko sotgipa nokrangona ra·ange rasongna mikkimna matgrikni bilko to·susana jri jri dake kadingdie rengsi sike don·achim.

British East India Company Garorang aro Zaminder-rangni gisepo neng·nikgrikanirangko nike aro mingsara kilko A·chikrangoniko joljol brena man·a gitaba cholko ra·e John Elliot Renghta rajako a·bri jol Karaibarini Zaminder dakna Companyna sedoataha. Douglas Cooch Beharni Commissioner ra·chaksoe Renghta Rajako A·chik a·songo badita kilrangko ge·a gamanio man·aha uarango mamingba gipin Zaminder-rangni pengpangani grian East India Company sokatchina a·bri jol Karaibari-ni Zamindar dakna British sorkari-na 1780 bilsirango bilko on·china chittiko seataha.³¹ Ia pilak John Elliot-ni sedoata gitan Government ra·chakaha, aro uko Mymensingni Collector Beyard-na u·iataha, indiba jensomoio ia pilak Government-ni kattarangko ra·angchina Beyard Renghta rajaona mande watatahachim uko Mahendranarayan Choudhury ua watata man·gipa mandeko rim·sruksoaiaha.³²

Renghta rajako Zaminder songaniko Mahendranarayan Choudhury Britishrangko pengpangatani jamano uni sina skang Zaminder-rangni kosako sko sote so·otanirangko daktaitaiaha. 1794 bilsini October 18 tariko Mahendranarayan Renghta rajani British manderang baksa nangrime kam ka·aniko nosto ka·beaha. Mahendranarayan-ni sipai jakrikra saksa Rudraram 1806 bilsini July jao siaha aro ua sipaini sianichi bilgrianiko u·ie A·chikrangba pilnipil Mahendranarayanko a·jak sokaha. 1807 bilsini August 15 tariko Karaibarini Goluknath minggipa songko dakgrike sak 15 manderangko so·otaha, aro apsan bilsini apsan jani antisagipao chongmotan 1807 August 21 tariko sakgni manderangko apsan songonikon dakgrike so·otaha.³³ 1810 oni 1817 bilsirangona changni chang Garorang Zaminder-rangni sinjetanirangna bobil dinganiko daktaitaiaha ua somoirango nok jam 157 mang so·aha aro mande sak 181 mangko a·kawe jolni rorirangko so·otaha.³⁴

²⁸ William Carey, "The Garo Jungle Book", Garo Edit.(Tura: Tura Bookroom,2017), pp.7

²⁹ J.B.Bhattacharjee, "The Garos and the English, 1765-1874, (New Delhi: Radiant Publishers, 1978), pp.34.

³⁰ J.B.Bhattacharjee, "The Garos and the English, 1765-1874,...pp.37.

³¹ S K Chattopadhyay, Tribal Institutional of Meghalaya, J.B.Bhattacharjee, *Social Formations in Prescolonial Garo Society: Problems and Processes*, (Guwahati: Krishan Kumar on behalf of Sectrum Publications, 1985), pp.249.

³² J.B.Bhattacharjee,"The Garos and the English, 1765-1874, (New Delhi: Radiant Publishers, 1978), pp.37, 38.

³³ J.B.Bhattacharjee, *The Garos and the English*, ...41

³⁴ I.M.Simon, edt. "Gazeteer of India, Meghalaya District Gazetteers Garo Hills," (Delhi: Directorate of Arts & Culture Distrit Gazeeteers, 1996), pp.21.

1816 bilsio Mr. David Scott British Commissioner am sandie man ani gitade Zaminder-rang Garorangni kosako sinjetanirangchi uamangoniko chatbea kajinarangko ra na mamingba pangchakanian dongjachim. Uandakgipa maming niam aro pangchakani griba A chik jatko sinjetanirangni kosako Renghta Raja dakgrikchakaha.³⁵

Pokkrirangko Kitani:

Pokrirangko kitani Renghta rajani mingsa dakrongbewalgipa kam ong achim. Ua saksa bil man gipa raja ong e nokkol chakol bangbegipa ia dalbegipa pokkriko kitna chu onga gitan bil man gipa ong a. Aro ming sa uni namen dingtanganide jeoba dong bo ua pokkrio cha telaia, unigimin jeo ua songdongbaaha unode pokkri dong telaiachim.

Pagitchamrang uamango bi sa saksaba dongja ine agana, indiba ma ambiko serikanirango Agund Renghta rajani depante ine seani gnan. Unigimin rajao deme chiksa dongjakon ine mitamrang aganskaa aro unasa raja aro rani uamangni janggi tanganio kusi ong na man jachim. Mande man e cha oba nokdang baku gamsengrang dong oba A chik nokdango me chik bi sa dongjaode mamung kusini dong ja, maina nokdang bakkuko man rikngigipa nokko nirik nisanna noko su songna, ma bitchriko rakkina, ma ambiko ripingna A chik Nokdango gamchatgipa gam jinde me chik bi saan ong aia. Ua deme chik gri sal somoirangko re atengon rajana mingsa namgipa chanchiani gisikona na baaniara uan pokkri kitna chanchianian ong a, jedakode raja aro ranini sia ja mano ia pokkriko nike uamangko gisik ra na man a gitasa ua pokkriko kittaha.

Renghta raja namen man e chabegipa aro nokkolrang, chakolrang bangbegipa ong ani gimin ua dalbegipa pokkriko mandearini jakchian kitaha. Pokkriko raja matchote cho ahaoba mingsa dukni kattara pokkrio chi tingtotsaba nadojaha. Pokkriko kitgipa manderang an tangtangni gitcima ba kodalarangko su srangna mamangba pokrio chi man jae duk man tokbeaha. Adita salrang re angahaoba chi tingtotsakoba man teljaha. Attam salniango Renghta Raja aro uni manderang noktangtangona re batokaha. Raja dukan gapengachim, maina jekon an tangni bimingko rakkina pokkriko cho ataha uaba chian nakatsrangjaha, indake ong bee chanchiengon bikan raja tu jripangaha. Raja uni tusipekmittingosa jumang mingsako nikaha. Ua jumango Dakgipa Rugipa Mite rajani nitobegipa jikgipako pokriona pringni do o gisikna skangan re ange pokkri gimiko re dulchina aro re duula matchotahaon pokkrini bijangchio dawil jange kitgipa chiakolchi napangchina aganaha. Raja ia jumangko nike namen ja jarengbeaha. Maina rani bijangchigipa chiakolona re angahaon chi mripahaode mamingsaloba uni ka sabegipa jikgipako a gilsako man taijawahachim. Da o raja badiako dakgen? Ranikon gimaatgenma? Ba pokkrikon chi gri galchipgenma? Ian dalbegipa rajana chanchina nangani ong aha. Pokkrio chi man jana jiktangko gimaatani katta namen dal begipa dukni ong aha.

Uamango bi sa desa dong jaani giminan da o ua dalbegipa pokkrikon gisik ra anina kitpaahachim, indiba da ora ua pokkrio chikon man skajaha. Rani A chik me chikna krae nitobegipa ong a aro uamangni janggi tanganiko atchu ambirangni aganrittingaoniko knaani gitade namen segipa pagipana ka sabegipa aro ranini gun gnanggipa ong a. Raja duk ong bee uni nkgimin jumangko uni nitobegipa jikgipana parakaha, aro raniba gisiko nangbee segipani agananiko knatimaha. Jumangko ma simano jikse namen grapbeaha aro ruutbee agangrikbeaha.

Rani namen chanchibee rajana indake aganchakaha, je an chingni sia kata jamano an chingni manderang ia pokkriko nikachi chasong chasong gisik ra china na a jajrengnabe anga nangni jumangko chu sokatgen ine rani ku rachakaha. Indiba uko chu sokatna skang angna sal gittam somoirangko on pabo jedakode angaba angni ripengskarangko bon kamgipa gronggrikaniko dakna ine somoiko rajao bi aha! Raja uni ka sabegipa aro nitobegipa ranini kattana mairongpile raja duk man beaha aro ka siksike grapbeaha. Bon kamao uamang sakgnian chanchigrikbeani jamano rani aganaha, an chingni ka sagrikani bimang pokkriko cha songnaba ong china angko pokkriko re angna on pabo ine molmolpile ranini aganahani gimin raja jikgipana uko dakchina cholko on aha.

Rani on gimin somoi matchotmano noktangona re bapilaha. Raja aro rani gipakgrike ku dim ku chote grape an tangni manderangko jakpa ripripe salam ka chotani chinko me soke pokkri ningni jangkiko (step) ja kusa ga onaton pokkri rikgongoni chi tok tak tok tak ga akaha ine agana. Bon kame bijangchigipa chiakolchi (Ringwel) ong onangengon rani rajachiko srisri niate mikchi dingding jakko ripripataiaha, aro chiakolchi

³⁵ Mihir N. Sangma, "Unpublished Document on Garo Affairs" (New Delhi: Radiant Publishing House, 1993), pp.24.

ka·sin ka·sin ong·onoroangaha, jensomooio ranini jak ripripangako nikjaha unon rangsan pokkrio chi gapaha. Raja namen duk man·beahaoba mamingkoba dakna man·jaha pokkrini nokgipade ua ranian ong·baha ine agana.

Renghta Raja aro Uni Mite:

Renghta Raja aro Uni mite, aro Dorga. A·chikrangni sko sote an·chi ringe janggi tangani gimin an·ching bangbea agananirang aro seanirangkoba knaa aro nika. Jerangkon a·song gipin chiga dingtango knarongja aro nirkongjachim, uandagipa ka·namgijagipa aro ka·gitting manderangni chadrapanina bangbata a·songgipin aro jat gipinni manderang Garo inako janapon an·tesreng an·chijring daktokaiachim. Uarangan ong·aigija songgipin nokgipinni manderang walchangana salchangana banoba ramao bidingo tang·gitik waltuna saldongna nangahaoba wal andalbahaon me·mang dalmang kal·akana mite bera mang·sinana an·skitani A·chik songko re·pako napakoba janggina jajrengani jamana skimanian walo gisik dong·tomja tuna mikil nomangjana walmadrang wal·tim so·e saksa sakgipin baksa jitsep nolsepe banoba bol bijak mojjimanaba ba a·brio balwa balsikanaba kengoke an·sre moesa walkon re·atrongaia ine agana.

William Carey·ni seanio janapani gitade, A·chikrang ‘olakkianio an·chi ong·atani aro ka·sanninggijagipa boli on·ani ong·rongbata,...do·biparangko, matchurangko, nokkolrangko, aro rim·sruke ra·bagipa manderangko, obostani kri boli on·a’³⁶ ine janapahaoba mamingdakeba Hindu miteko A·chikrangni olakkianiko seani dong·ja. A·chikrang bangbea miterangko olakkioaba dakgipa rugipade Tatara·Rabuga dalbatgipa mite ong·a inesa janapaha³⁷. Miterangni bimingrang Saljong mi·misini mite, Goera bil·jakni mite, Kalkame janggini mite, Abet·Rangupa burung bolgrimni mite aro uandake dingtang dingtang miterang dong·a, indiba darang miteni bimangko A·chikrang bimang dake olakkija. John Eliot·ni seanio Garorangni bebera·ani Hindurang gita apsan dakanga ine janapoba Garorangni Kaliko manianiko janapani dong·ja. Unigimin mamingdakeba Renghta Raja Kali miteko jilani jatni A·chik jatni bewal ong·ja, bebera·anio hindu gita dakgenchimoba Hindu inede ong·ja. Bebera·anirang jedake mande sie atchitaitaianirangko niode Hindu karma·o bebera·anirang baksa apansanga uandagipa apsanirangni giminsan ‘hindu gita’ dakanga ine agana.

A·chik pagitchamrang aro nokma rajarang noko gam bangahaode aro a·song chiga dilsatode uko nirikna nisanna mite jilana sam ge·ana. Renghta rajaba saksa gam banggipa bil man·gipa raja ong·ani gimin mite bilakako jilaha. Lt.Sonaram K.Sangmani serikanio “skal” ine janapa, indiba ua skal ba bera Hindu ba gipin jatni mite “Kali” ba “Durga” ong·ja. A·chikrang mamingdakeba hindu ong·ja, indiba songsarek jekon mandeni gimin am·sandigiparang “Animistic Religion” ba “Primal Religion” ine agana.³⁸ A·chikrang bangbea an·tangtangni gisepo miterango bebera·ani gnan, aro miterangara mandeni dakna am·gijagipa aiao inmananirangko (supernatural) ong·atna ama. Mandeni atchiaoni siaonan ua miterangni bilni ningon janggi tanga aro siangni jamanoba janggi silchina miterangni bilo aro sasonni ningon ong·a. Renghta rajani mite jilgipa Kali mite ong·ja, indiba mite ba berasa ong·a, jena ua bilsiprako mande sakprako bolina ine ku·rachake (oath) ra·aha. Ua mitenasa uni songnokni manderang bilsiprako sakprak dake sulsul nokdangni kri on·rorona nangachim.

Renghta Raja man·e·cha·gipa gam banggipa ong·ani gimin ua an·tangni a·songko chelchakna aro songko noko nirikna nisanna nitim nirokgipa miteko jilaha. Ua mitena bilsiprako mande saksako on·ronggen ine ku·mikchetanikoba dakaha. Ua mite ba bera, jekon mitamde ‘Skal’ ine agana, a·songko chigako chelchakasan ong·aigija rajana nangan salo uni bi·anirangna patianikoba on·rongachim. Jensomooio ua pokkriko cho·eba chi man·jaha unoba ua mitesa una jikgipako ua pokriona re·dule niroke bon·kamao bijangchio chiakol dong·gipaona re·angchina jumango aganaha. Ua mitena bilsiprakon rajani songnokni manderang nokdangni mande saksakode on·nan nangtela.

Mitena Boli On·ram:

Mitena mandeko on·chakna siltinchi ka·dulgipa noktopko Raja tarie don·nachim, ua biapara jeko da·o ‘Dorgah’ ine minga uanon mitena manderangko ua rikgimin noktopo walna skangan je nokdangoni mandeko on·genchim uko Rajani sipairang rim·e ua noktopo ka·tate don·eachim. Ua biapara namen gro gipeng apsane dilnenggipa a·timbo dakgipa biap ong·a. Uan da·ode Bangladesh Border chapchap ong·aia, indiba ua biap namen rona an·sengbegipa biap a·timbo ong·a. Bangladesh a·kaweko nigamtoa, saliramchi

³⁶ William Carey, “The Garo Jungle Book”, Garo Edit.(Tura: Tura Bookroom,2017), pp.30.

³⁷ John Elliot "Observation on the Inhabitants of the Garrow Hills made during a public deputation in the years 1788 and 1789", Asiatic Research, Vol.III.pp.12.

³⁸ Krickwin C.Marak, “A·chik Jat aro Kristian Mission”, (New Delhi: Glory Graphics Pvt.Ltd,2017),pp. 32.

a·kaweo mi, gom, aro grik bari baganrangko aro tombrot tombrot dake simdim simdim dake Bangal songko nigame rona namen an·senggipa biap ong·achim. Ua biapo Raja mandeko skalna on·chakna noktop dake rike silchi kadulachim, unosa mandeko ka·tate mitena ba skalna cha·china aro uni songnoko chelchakchina ba patichina boli gita uni ku·mikchetaniko chu·sokatengachim.

Shah Kamal, Sahid Jamel Khanni depante jekon ua jolni Hindu, Muslim aro Garo Sangsarekrang namen mingsinga aro dale ra·achim. Ua mitena on·gnigipa A·chik me·chikko jokate uamangko jik kimaha aro uamangni gopramkosa da·alona kingkingan Dorga mingkuenga.³⁹

Ua kamal Renghta Rajani jilgipa mite-na Nakatchini nokdangni boli on·ani palo an·tangko on·skana re·bae ua mite-ko dakgrike amaha. Unigiminsa Renghta Rajaba uan mandeari ong·ja miteko skalkon dakgrike am·gipasa ine una aro uni jikgipana an·tangni a·aonikon 1284 acres a·ako on·aha. Jekon Britishrang song·noko ra·ahaon kajina ra·gijagipa a·a (rent-free) dakataha jekon Peerpal Baklai Estate, ine mingaha. Da·ode ua a·aoni Nogorpara A·king-o bigha 900-ko 2001 bilsio napataha, aro bigha 100 Peerpal Saha Kamalni ning·o jekon Dorga Sharif ine agana, bigha 184 mangde Bangladeshni ning·o ong·aha.

Ua boli on·chakgipa biapo Kamal Na·katchiko jik kime song·dong-a·chae siangaha. Uamangko ua biapon gopaha ua biapkosa uamangni gopramkosa Bengali ku·chi ‘Dorgah’ ming·a jeni ortoan ‘gopram’ inesan ong·aia. Ua biap da·o namen rotogipa ong·a, uan Bangladeshko nigame balkasinko ra·chake sal dingbemittingoba uno dong·gipa bolrang, aro kejur bolrangni salikimo rona namen ro·togipa biap ong·a. Uno chi tubegipa chiakol damsang gnanng jeni chi chimite pokrini chi baksa apsan ong·aia, ua chiakolo chi gitachakode chimiteoba chi gitachakaia, unigimin ua chimikni chirama apsan ong·a ine nika.

Na·katchi aro Ganje:

Renghta Rajani mite ba bera-na ru·uta salrang karirang re·angahaoba songnokni manderang bilsiantian tikgimin nokdrangrang grap mikchi-sepe basakoba seko-pako, basakoba jiko-deko, aro an·tangni detangko ba sutangkoba ka·agale, janggi si·e mikchi chiwaringe grap mangasie, sintie dopilgrimeba mitena boli on·tokengachim. Manchisogimin sal somoi gita sulsul nokdangrangna tikbaengon, Na·katchi minggipa segri pagri kangalbegipa maningsani nokdangona ua tikgimin bak gita mite ba bera-na mande saksako on·na nanggipa sokbaaha.

Sal somoi sepangrorobaengon nokdango darangba dongjae mitena ma·gipakon on·genma ba deme·chikon watgenma, cha·o cha·napjajok, ring·oba ringnapgija dong·tokaiaha. Somoirangko nisoie ma·ningsa grap mangasiari, mikchi chawaringe dukchi supeke, mitena an·tangtangko on·gniko chanchisoe misil misil ka·a be·e mandean mande gita dakangtokpiljaengahachim. Maningsaan greng rikok rikok simprakprak daktokpilengaha, namen duk aro sintibeanisan ong·aiaha. Basakoba ma·ningsani gisikrangan tik ong·angpiljaengaha, jegrikpilani, solgrikani miknenggrikanirangba uamangni gisepo ong·pilaha. Darangba iandakgipa a·sel obostao ka·dimeatanirangko ba naljokatanina ku·mong nangrimanirangko on·aniko nikani dong·ja, haida uan ong·rongbewal ong·ahani gimin darang ma·drang bakskaoni ba abi-anurantoniba katta ku·pa dong·jahama maming janapanirangko nikja.

Mitam pagitchamrangni aganani gitade, Na·katchini deme·chikni bimingko ‘Ganje’ minga. Na·katchi saksaa A·chik me·chikna krae bimang daknanggipa aro nitobegipa ong·a. Dala dalbregija, chona chonbregija, dimrimbalbal nitobeachim. Sokna bol bigilko ampak kike bara dake gana, unigimin sokme chaka kaako ketchi gita nikaia pong pong Chitmag a·bri gita, pakmao rimir trit rinokbalbal ro·ong-gisim mabake dong·a gitasa Shah Kamal nikchengon bika rinok ku·chi minok dakmanaihana. Ok kangkapkap gandilna maming champenganian dongjae kangkare kangkape boldoreng dambol baa gita nikaiachim.

³⁹ I.M.Simon,eds.,“Gazeteer of India, Meghalaya District Gazetteers Garo Hills”,(Delhi: Directorate of Arts & Culture Distrit Gazetteers, 1996), p.235.

Ru-uta salrangna cha-gija ringija dongengahani gimin mande ku-agana gambregija ku-rang ku-sana ku-angoba ka-sirokrok mandean bilgribee nomengahani gimin Shah Kamal mandeko nikarin ka-sachakanian gapaiaha.

Duk baksa janggina su-pekmitting somoi ong-e ganatang chinatangnaba name simsakbreade ong-jaha, kangkare gandil nakate kamachipak re-king paltakkosan gankapaiachim. Japing matrong ja-geteng gita ja-pate simchireng mande an-gil sakchigrik dake, re-king paltak ganaiani gimin soomdik salchepe asongaoni chakaton, bibal balgaobamittingo pulni rong maga daka gita re-kingni maga dakako nikon gisik an-jrimpila ka-tong an-sre moe bangbango balwa balpakanga gita an-tangkon kamalni gisiko ka-namgijagipa chipakore rongbrako satpakea gita ka-tong an-sre mopilaha. Duk aro kalimesa dongengani gimin Na-katchi aro Ganje ma-ningsaan kni bilse bildak dakesa kotip ka-pinggija, kni watsre-srae dong-aiengachim. Nokmikkangni krongo dandane kni watketchio kni gisep gisep matchok mikron gita tangsimbit silbegipa mikronchi mande agitalko nikchakenggon, nikarin ja-ko ja-sinapanga gita, gisikon dike muni pua gita, ka-tongkon balsri balwa baljipjange jama-ko balnapanga gitasa, salchangkario snaru bibalna mande tuna mikil noma gitasa janggiko jamako kamalni gisik ka-tongko balnangaha. Me-mangma jumangma, miteanma mandeanma ine Shah Kamal an-tangni jakpongko seete nipilaha.

Shah Kamal Na-katchi aro uni deme-chik sakgnini duk ong-bee dong-mitting somoio sokbachange uamango cha-aniko bi-aha aro uamangni pal uan mite ba beraona unwalo re-angskagen ine aganaha. Ua kangal ma-ningsao ua kamalni agananiko ra-chakna chanchina maming ka-dongchakanian dong-jaengachim, indiba kamal molmoltaitaie aganahao uamangni gisik mikselaha aro kamalna uamang ma-ningsaan nokni je jila do-chang gipokkon je mirong rongkit dongpara uko sarao an-tang mikkangtango pu-e do-ona kik kike okamate sepango do-o ja-rimitgipa do-bitra bitchi china pegitchak an-sengbagipakon rim-aha aro ra-sote songe chane on-aha.

Gital ka-dongataniko man-pae da-o Na-katchi aro Ganjeni mikkang tangbaaha, kenanirang aro jajrenganirang gimasrangkujaoba on-tisa rangspiani uamangona sokbaaha. Na-katchi deme-chik Ganjeko an-tangko dakchakchina aganaha, aro uamang noksamo ja-lik miseki (chonbegipa aro namen sabegipa jal-ik)-ko wasingo e-ching baksa su-kningataha. Samdiko chichabagipa do-o be-eno uko pu-dapate skel skel song-aha chanaha. Songman-chanmanoa Kamalko cha-china nokningona okamataha. Shah Kamal baditaba salna cha-gija brangrorobae okrie jegita jal-ik sabeoba uko mamingkon u-ijaha, je man-ako cha-atoba maming toa toja singani dong-jaha. Na-katchi kotip kapinge Kamalna mi-tin chi-tine on-aha. Nakatchi do-o ja-rimit do-bitrako songako Kamal okribee mamingba kratchaani dong-gija mi sae on-a gimikon maming ra-rik salrikani dong-pilgijan cha-atokaiaha.

Kamal cha-man ringmane tusipekangaiaha, unon Na-katchi aro Ganje ma-ningsa indita salna augija miksugija sal aro walrangko re-ataiahani gimin be-en an-chinik seengatangkon u-ipilahani gimin ma-ningsa Bingka chiringchi auna re-angtokaha. Chiringo ma-ningsa karitchichi sko knitingtangtango su-e, janggil bolgro paatdingko roongchi karang natgrike aue miksue re-bapilaha. Deme-chik skang re-bae nok doga jangbatrako oprakon Kamal tusipekgipa mikrakbaaha. Na-katchi kni sosiate gochichie re-king paltak ganari an-tang kabak bokako ampakko gipmangija sokme dare protchongko gilgipgija patape re-baengako kamal nikataha. Na-katchi kamalni bichipak miksonge mikjapilgija miktuatgija niako nikate kratchae mikkang gitachak dakpile an-tang ampakko saljite an-tang kabako patapataha. Kamal kadingsmite tusipeka dakangaiaha.

Adita ampak su-srangbaako wa-gongo ram-krangataha, aro an-tang kni warengko warongo gatjole salo ramprangataha. Kni ransisiate ma-ningsa ongaloni mi songako do-jarimitni ja-si-jaksi, bikbik atom aro gitchem bijakrang kamalni cha-spako suale cha-tokaha.

Unwalo kamal ua mite baksa bilchi aro samchi dakgrike bon-kamao skalkon am-srangaha. Kamalni skalko am-srange pringo re-bapilahaon Na-katchi uko mitelani gita an-tangan kamalkon se kimaiaha. Uamangni gopramkosa Dorga ine biming donenga.

Renghta Rajani Bon-kamgipa Salrang:

Renghta Rajani sason ka·ani bewalko niatode namen democratic chong·motan manderangni bilo aro agan·kupatio sason ka·gipa aro jatni neng·nikaniko chelatna a·songna man·ani cholrangko dakdiligipa ong·a. Ua Zaminder·rangni kosako namen dakgrikchakbeaha, aro ua an·tangan be·en gisikni gita saknaanirangko man·pilaona kingkingan kamko ka·aha. Ua saknaatani aselan uni chanchianirang aro kamrang basakoba skatang dakanirang gita dakpilaha.

Uni bichal ka·chakram katchari ba bilchal ka·ram nokrangba dong·achim, uan South West Garo Hills·ni saliram Bangladesh bordero Boldamgre songo da·oni PWD sorok sepango Dengna chiring kosako atimbo dakgipaon ua Katchari ong·achim. Ua biapo da·onaba a·ao medik samdik aro gitcham jakkalani bosturangkoba man·kuenga.

Uni janggi tangani gimin rongtalbate serik·jotrikanirang dong·jaoba ua 1815-1820 A.D. bilsini gisepo Mahendranarayan·ni Karaibario Zaminder ong·mittingon siaha.⁴⁰ Uni jamano uni depante Agund pagipani pal ja·chongrikaha. Indiba maibakai Agund Karaibarini Zaminder baksa bakrime kamko ka·aha, Karaibarini Zaminder Agund·na Palki (palanki, chongmotan jekon skangni Indiani rajarang nok dake tarie an·tangni sipai ba nokolrangchi ripeatronga)·ko boksisi dake on·aha. Ua palkikon Agund gam·gajing, gro·apotio, song·re·songabatao an·tangni nokolrangko ripeatesa re·rongaha.⁴¹ Agund pagipani bil, gam·jinko aro sason ka·aniko man·rike haida pagipani jatna a·songna chelchakani, simsakani, aro ka·sae dakani kamrang gita ong·jaha. Agundni kamrangko bange nakatjaha, aro uni jamano sawa ja·chongrikaha maming gipin serikanirango dong·jaha.

Chimite:

Chimite A·chik a·songni saliram Nogorpara song Bangladesh Border sepango dong·a. Ia pokri namen biap an·senggipa, rona rotobegipa, samtangtango nitobegipa kejur bolrangchi duule samtangtangchini a·bri nigame donggipa chibol ba pokri ong·a. Chimiteni gimin chengo chengonin A·chik pagitchamrangoni agan·rittingbaani donga. Chengo saksa A·chik pagitcham Renghta raja jean Lengti ganne dongaiachim ia pokriko kitaha (An oral tradition of the fore fathers). Ia pokriko mandeni jakchi kita inen mikronchi nike agana man·aia, maina samtangtangchian mandeni jakchi kitani chinrang dong·a. Uan kitik ge·bri daka, aro saliramchipak noksikoni chijangchiona jangki cho·on cho·on dakbagipa dong·a. Wilwillao biaprang gananga aro mamingnaba kenna nanganirang dong·ja, da·o dipetna maming mandena namgijako dakanirangko knaanirang dong·kuja. Apal jolo namen salrang dingbeoba ua pokrini rikkamode namen ka·sinbea, aro chioni balwarangchi balpongatao namen ka·sinatani gimin rona namen an·senggipa ong·a. Meghalaya Tourist Department 2015 bilsil biaprangko tarie nitodapatengaha.

Chimite ine agana ortode chini mite dong·a ine bebera·a. Skangde ia chio darangba auja·miksua. Atchu Sonaram K.Sangma·ni bilsil 10 bataonan chongmotan 1910 bilsimangonade ua chio ja·su miksuna aro auna paja, maina chio Gorial bangbeachim. Saoba skatang dakode Chimiteni mite doka ine bebera·a aro saa ba sia. Saanina sianina keneming Chimiteni mitena dobok, dud aro terikrangko on·esa sagipako namatna man·a ine agana.

Pokriko Kitani Bilsirang:

Pokriko kittani bilsil karirangko u·ija, indiba 1730-1750 bilsil mangni gisepo kitna nanga, maina pokkrio man·gipa skang chasongni gamchatgipa dingtang dingtang Coin·rangko (Paisa Bisil) nie ua bilsirangni gisepo ong·na nanga ine sakirang gnang.

Pokrini Rokkom:

Pokrini apalani gro gipeng chu·gimik a·a baksade Bigha 84 dong·a, aro uni tu·ani June 2018 –o angni toe niani gitade feet 18 ba 25 dong·kuenga. Chi arak wachi bandede dingtanggrikani dongrongja, indiba sal rakchangkario feet 18 rang tu·a indiba wachikariode feet 25 mangde ong·telaia. Pokkrini bimang Rectangular (Noksik ge·bri daka) jatchio Ring·well·ko kita ine janapanirang gnang. Pokkri so·onchok dake kitta (dikka ki·sang), pokkrio auchakram chiga dake dambri taria, uaragara Salaram·saliram, aro Salgro·salgipeng. Ia chigarangko 18 (inch) gro·gipeng ong·e dalgipa a·asanchi (brick) step ba jangkiko

⁴⁰ Walter Hamilton, "A Geographical, Stastical, and Historical Description of Hindostan, vol.II," pp. 758.

⁴¹ J.B.Bhattacharjee, *The Garos and the English*, (Delhi: Radiant Publishers, 1978), 45-46.

chijangchiona kingkingan nitoprete tarianga, indiba agangimin chijangchio chiakol dong·a ingipako badiagipa manchao ong·genchim name ma·sina manjaha.

Pokrini bimang aro uno nikiparagon ian mandeni cho·gipa pokkri ine name sakkiko man·a, maina pokrini salgipeng saliramchipak noksik gita ong·onangode cho·on cho·on dake chijangchiona kingking a·ako galdona don·a jangki (steps)-rang gnang da·alonaba uarang dong·kuenga. Ua jangkirangko ita-rangchi (bricks - ro·a 6 inches aro apala 3 inches) name dake ja·a ga·chate ong·onangna aro ga·dobana agangimin jangkirangko anaha. Pagitchamrangni aganrittingbaani gita chijangchio dawil-jang dakgipa tu·begipa chiakong dong·gipaonan ia jangkirangara dakonnanga ine u·ina man·na. Samtangtango burung bolgrim namen daldalgipa bolrangchi ganggopachim, aro jegita pokrini wilwilao bolrang bangbeoba uarangni bijakrangni ga·ake pokriko mitchiatianian dong·skaja.

Chimite Pokrio Miteni Bil Dong·a ine Bebera·ani:

Chimite rikam rikam wil wilao dal dalbegipa prap bol, giting bol aro boldureng chi rikamsrek bang·en dongachim. Indiba ua bol bijakrang chio kingsaba ga·akja, chirang simchi rikrik dake rong·talbea uarangko nike nie pagitchamrangni aganani gita mite mande dong·na krakra daka.

Inditan burung bolgrim dikpripipani jatchio dong·gipa chio bol bijak kingsaba pokkri chio dongja, unigminsa uko rongtalatgipa jekon chini nokgipa mite dong·a ine bebera·a. I.M.Simon-ni “Meghalaya District Gazetteer, Garo Hills Districts”-ni page 236-o serikanirango John Elliot-ni British sorkari-na seatgiparagoniko janapgipaoni manderangni bebera·anio nangchape seanirang gnangchim. Uaragoni manderang dud aro pilak on·anirangko jensomoio chio don·atgen, unon ua on·anirangko dong·chakgipa plate lotarang chijangchiona an·tangtangan ringchoanggen aro uno on·gimin dud aro bolirang mangmang ga·akriktoke plate lotarang mangmang chisamona chobekbapilaiachim.⁴²

Ua pokkrini chiko ringna on·ja, pokkrini rikam joljimikan bolgrim wagrim dakaia aro jensomoio ua wilwilani bolko den·sotaha ua somoio chi an·chi dake gitckakaiaha, aro indaken jadokna kingkingde apsan daken chini rong dong·aiaha ine da·o Nogorpara dong·kuenggipa pagiparang magiparang agantoka. Gisepo ua jolo donggipa manderang pokkrio ba uni wilwilaon chipu dalbegipa jekon Sangkni minga uko nikrongaiachim,⁴³ saoba ua sangkni chirikamko maltongmittingo nikode uni maltongani matchotaniko ruute sengoba matchotningrongjachim.

Unona boli on·na re·baon pokkrioni pilak songa-CHANANI bosturangkode badita sak mande sokbaa uni kri nakate on·naiachim. Jamano kamrang matchothaode je bosturangko nakate on·ahachim ua pokkrini pilak bosturangkon chion don·atpilna nangachim. Atchu Sonaram K.Sangma sagini aganani gitade salsao Habes Miani atchuni atchu Pekhu Miani depante chioni nakate on·gipa chachak-ring·chakani sonanirangsa ong·tokani gimin mikboke nokchina ra·e katangachimna. Unon ua mande nokchi sokangarion saa bilonge siaha. Untaltal chioni chachak ringchakani bosturang nakataijaha ine pagitchamrang agantoka.

Hajongrangni Chimiteni Miteo Bebera·ani aro Ka·dongani:

Hajong manderang Chimiteni miteo ba Renghta rajani mite ba bera·o uamangni duk neng·nikani somoioba chelchakgipa mite dong·a ine uamang bebera·a aro ka·dongani dong·a. Shri.Kapil Ch.Hajong Kodaldhowa jolo saksa dilgipani aganani gitade Hajong manderang namen kangal cha·asiani dong·ani gimin basakoba biao ba kam asel songo-noko ong·ani somoio gital bararangko (Pathin, Not Gohena – Necklace, Nose ring, ear ring etc) brena tangka paisa dongjaode ua pokriona re·bae puja ka·ode pokrioni ong·kate on·achim. Uamang indakgipa bebera·anio nangani somoio Chimiteona re·bae Renghta rajani miteo puja ka·achim aro uamangni bebera·ani gita man·achim. Bilsirangna uamangni janggi tanganio mongsonggipa pangchakani Chimiteni miteon ong·aha, aro uamang kakket aro mikchikimao chirikamona re·bae puja ka·rongachim. Uamangni puja ka·aniara da·ororo hindurangni miteo puja ka·anioni dingtangachim, maina uamang Chimiteni miteko olakkion un mamingni bimangkoba dakjachim rujachim.

Bilsil bilsina indaken uamang janggi tangbaengachim, indiba salsao saksa Hajong me·chik bara kancharangko jekon ua pokrioniko man·achim uko ra·bapilon name su·sranggiya ra·baaha. Unon Renghta rajani jilgipa me·chikna jumango prete aganaha. Chongmotan nangni bi·sani ki·e su·bu chongmotan sua soti

⁴² I.M.Simon, ed. “Meghalaya District Gazetteer, Garo Hills Districts (Delhi: Directorate of Arts & Culture District Gazetteers, 1996),p.236.

⁴³ Manuscrite of Lt.Sonaram K.Sangma

nangako name su sranggija ra bapilaha, uni gimin mikkangchide na simang bi ako am ako anga on tajawaha ine Renghta rajani mite uamangna jumango pretaha. Ua sal intaltal jegita puja ka oba Hajong me chikrangna on tajaha.

Minggipin ia Renghta rajani mite ba Chimiteni mite baksa cha gronggipa ong chongmotgipa golpoara 1924 bilsio Gopraioni (Kurung Hajong) Hajong me chik saksa Kamaka temple oni mitena kamko ka gipa sima nianirangko agana man gipa me chik chongmotan kamal gita kam ka gipa nokoni pring sengmitchibamittingo ka namgija dake Chimiteona katdrabaaha. Uko songni nokni manderang adita sak bilak wasagipa me asarang rim oba uko champengna man jaha. Ua songoni katbae Nogorpara Chimite ni chio gitokoni skochipako nakatate napsrime dong aha. Ua somoiode chimiteo gorialrang, daldalgipa chipurang bangbeani gimin darangba indake chio napsrime auna miksuna patokjachim. Indiba ua me chikni chio napsrime salgimikan dong genchimoba maming jonturangba ua me chikko chikjaha cha jaha. Uni songni nokni manderang gimikan uni ki sang ki sang ja rikbae Chimite ona sokbatokaha aro uamang pokrini rikkamosan gimikan mamingkon dakna patokjae uni chioni ong katkujana kingking salgimikan sengtime dong aha. Ua me chik sal napangani jamanosa ong kate nokchi re angaha aro uni jaman jaman songni nokni manderangba ja rikpaenge uo maina indake dakaha ine sing tokaha. Unon ua me chik pokrini jatchio Sonani ring bolsa aro uno namnambegipa nok jam dong a ine aganaha. Ua chini ningo songgimik a gimikni madrang maharirang dongpila, aro uamang ua me chikko re bapilna on jachim, indiba uni deme chik saa dong a ine aganani giminsa uko re bapilna watatpilaha ine jinmarangna ua aganaha. Ua somoimittingode uano Gorial, Aringa aro daldala chipurang chio aro chirikkamrango bangbeachim, matchurang chi ring na chirikkamona re anggiparangkong chike cha rongachim, indiba ua Hajong me chikko mamingba chikjaha. Uni gimin uni madrang mahari aro manderang Chimite ona re bae dud, terik, aro tangka paisarangko on e puja ka e donangaha.

Chimite Pokrini Patiani:

Chimite pokri Nogorpara songna aro ua jolo song a chagipa manderangna namen patiani ong aha, maina darang chimik tipchangoba ua pokrini chi mamangsaloba tipchangja ran changjachim. Skangni Salrango Dorga o mela cha ani somoirango ua pokrionikon bi sarang a ako kite kite unoniko tangka bisilrangko man achim aro uko ra en pante metrarang mela cha a ine da o dong kuenggipa pagitchamrangba agantokuenga. Uaransan ong aigija ua jolni manderang a bri jolo mekatchi (kosta) a bao ge oba uamangni mekatchiko chimiteon simna ra baaia, maina ua pokrio simgipa mekatchiara sonani rong dakani gimin palanio dam rakbate palna simna man achim.

Badia bilsirango ua sepanjolo dong gipa a arangko gam a ge anirango mikka wajaie chi man jaob unoniko saldoe mi misirangko ge tokna cholko man aia.

Nogorpara Fishery Co-operative Society Register ka e pokrio na tokrangko jile uni man a tangka paisarangko School na 25%, Mondolina 25%, Songsalna 25% aro uno share member rang ong giparang ba committeerangna nanganirango jakkalna 25% dake jakkalenga. A ani patha vide.00 No.1107-06, Memo.No.GDC-Ref-75/-62, Bigha 80 ong a.

Nogorpara Baptist Mondoli bilsio 50 ong aniko maniani 2012 a bachenge uko joljol 2017 bilsiona kingking Mondolini NGO Besa Society, Meghalaya Tourist Department baksa bakrime kam ka e adita namdapatanirangko dakaha. Uno ja achi ga jipgipa ringrangko Meghalaya Tourist Department Besa Societyni gita sanction ka aha, da ode uko nina re bagiparang japrako komigija 3000 mangde ong rongenga aro uno dokanrangko dake pale sime cha gipa songni nokni manderangna bangbea dakchakbeaniko on enga.

Renghta Rajani gipin Pokrirang:

Renghta Raja mingsa ding tangmancha bewalara ua je biapoba dong oba unon ua pokrirangko kitaniko dakronganiko dakaha, haida uan mingsa uni bimingko chasongna tangatani ong aha. Chimite pokrioni 2 km chelgipao Kodadhowa, Boldamgre songo Rangdokram ba Randi Pokri, aro Garobadhaoni 3km chelao Balapara songo Raja Pokri jekon mongma auatna kita ine agana.

Kodaldhowa.

Renghta rajani Chimite pokriko cho mittingo uamang auna miksu ja suna mamangba chiko man ningjaha. Uni gimin salsao raja aro uni manderang chi ong na kragipa biaprangko sandiaha aro adita reangon chi ong na kragipa biapko kodal bilsa cho e nichengaha. Unon ua biaponiko chiko man bebeaha. Cho chakatna

skang raja mingsa niamko don'aha, ua niamara sakprak Kodal bilprak una bate darangba cho'na manjawachim. Ia niamo pangchake cho'tokaha aro chiko nangana batpilen man'aha indaken an'tangtangni gitchima ba kodalarngko ua pokriosa su'srangaha. Ua biapara Chimiteoni salgrosalarangchipak 2 km chel'ao dong'a. Da'o ua biapo Hajongrang songdongenga aro ua songko Kodaldhowa ine ua sal intal da'ona kingking mingenga.

Kodaldhowa uan Nogorpara songni salgrosalarangchipak Chimiteoni 2 km chelao dong'a. Uan 14 bighas dong'a, aro uni sepango mite olakkiani nok dong'a jeo Kodaldhowa pokkriona dakonangachim.

Raja Pokri ba Tal Pokri:

Garobadhaoni 3km mang chelao Balapara songo Renghta rajani mongma auatna kitgipa bigha 4 ong'gipa pokriba dong'a. Uni tu'a 12 ft, ua pokrionaba darang chiringoni jokbagipa chiring nangdimea dong'ja ua bigha ong'gipa pokri an'tangtangan chik gape aro namen rong'talbegipa ong'a.

Ua pokrio gamchatbegipa sona, rupa, aro Renghta Rajani kajina gile chimonggimin paisa bisilrang dong'a ine agananirang gnang. Renghta aganbagimin gita Nogil anti-oniko Zaminder-rangni sinjetanio kajinarangko chimongaha, basakoba ua Zaminder-rangni rakkie on'gipa sipairang skatang dake A'chikrangko ka'namgija dake dakdraanirangba dong'a. Changsao John Elliotni A'chik a'songona re'baani jamanoba saksanokmani jikgipa Mommee aro sakgipin nokmani jikgipa Sujani minggipa indake Zaminder-rang aro uamangni sipairangni kalstape ro'ani gimin grap grape una dakchakaniko on'pachina molmolbea.⁴⁴ Uandakgipa kalstapanirango Garobadha jolni pagitchamrangni aganani gitade Renghta indakgipa ka'namgijagipa kamrangko ka'a ine agana aro unigiminsa uko Pagla raja ineba bimingko donaha. Chong'motko namedake sandiahaode Renghta Raja ua kamrangko ka'genchimoba ua Zaminder-rangni sinjetaniko chaktojaesa dakaha. Ua Zaminder-rangni draataniko man'e Purana Putimarioni anti-aking cha'na re'bagipa, palna srena re'bagiparangoniko bosturangni pal Nomil metrarangko anti-angsil ra'aha. Anti-bazaar-on manderang an'tangtangni noa-namchikko aro jiko deko on'an nangtelaiachim, on'jaode uamang an'tangtangni kil ba bosturangko anti-o palnan man'jachim. Uandakgipa ka'namgijani kamrangko dakna sikjaoba songantini bosturangko palna re'baon chaktogijani ka'beani ong'genchimoba janggi tangna nakkam kari aro gipin gipin nanganirangko brepanara nangani gimin basakoba chaktogija an'tangtangnime'chikrangko on'tokaha.

Indake Noa-ko namchik-ko angsil gilani giminsa ua angsil gilchakgipa biapko 'Nogil anti', chongmotan 'no' ortode 'noa-namchik' inanisa ong'achim, indakesa ua biapko Nogil anti ming'a ine bimingkon don'aha. Da'ode ua biapko Garobadha ine bimingko don'skaaha. Uno song'achagipa achagipa manderang bangbatan anti-ona bostu ra'bagiparangko Renghta Rajana oltimgiparang ong'achim, unigimin ua jolo dong'gipa manderangara bosturangko rajana oltimgipa chiltimgiparangan ong'aiani gimin mamingkon aganna patokjaha. Uandake bosturangko hisab ka'timgipa saksan Singran Chambugong Marak Sonamite songni aro ua jolni Chambugongrangni chra dalgipa saksan dong'achim, aro uan ua ong'a obostarangko chantime setime on'rongachim. Angsilrangko hisab kamanode bosturangko aro nomilrangko rajaona ra'change uamangko Zaminder-rangona sokatrongachim, aro uandake bosturangko chiltime aro Nomilrangko rimangtime ua jolni manderangan on'rongachim.

Badiaba somoio nomilrangko manteljae an'o donggiparangkoba angsil on'ode uamangko an'o dong'a ine aganode ra'chakjawa ine tole maikoba cha'pretatesa ineming uamangko ok ratprakeba niaiachim, unigiminsa ua rajako Pagla raja ine mingtokaha.

Ua somoirango Simjeng Marak Rangira Silsikka songoni Digi Muni Man'gipa bilak wasagipa aro chanchina changkalgipa anti changantian indake an'tangtangni deme'chik, noako-namchikko angsil on'time dongaiode namangaengaha ine manderangko ku'monge chanchidilaha. Uni chanchidilano pilakan aiao nambebejaengaha, an'ching maikobade dakna nanggen ine namniktokaha. Maina 'an'chingni anu-namchikrangko, chame angjikrangko indake antirikkit songantioniko angsil on'na nangode, an'chingni anu-namchikdrang, chame angjikdrangde bonkimaigenok,...sako ama ra'nawa, sako angjik dong'nawa' ine Saka Matchi (Jengjal) Danek Rochon(Rochonpara jolni), Sadol Baliking (Sadolpara jolni), Ranggira Silsikka (Ranggira A'biding jol), Rom Sangsil (Rom Agal jol), Dura Baliking (Tura A'biding jol) pilak a'jolni anti chagiparangan ku'mongtoke Renghta Raja aro Zaminder-rangni kosako a'jak sokna chanchitokaha⁴⁵

⁴⁴ John Elliot, "Observation on the Inhabitants of the Garrow Hills made during a public deputation in the years 1788 and 1789", Asiatic Research, Vol.III.p.33.

⁴⁵ Mrinaloy K.Sangma, "Garobadha Songni ong'baani" in Souvenir A'chik Baptist Garobadha Mondoli, Silver Jubilee 2013,p.12.

Uamangba uia bilchi jakchi dakgriknade Renghta Raja saksa bilgnanggipa man'e cha:gipa aro sipairangchi ganggopako man:gipasa ong'ani gimin uko ramramari mandearichi dakgrikode man:jawa ine uko Digi Muni pe:achisan uko a:jak sokna chanchie namniktokaha.

Uamangni chanchigimin gita uamang Nogil Anti-o Renghta Raja aro Zaminder-rangni sipairang re-bebehaora uamangni cha:ronggipa ringronggipa dokano muni pue don:soaha. Uamang angsil nomilrangko chimongman-o Maljanggrio a:kingo biap damsa dong'a ua biapni bimingko "Dolan" minga chongmotan, dalam ba nok dong:achim unona re:angtokaha. Renghta rajani alda nok uan ong:achim, indiba ua nokap dong:chakgipakon da'o Ganol chi jokchakgipao ga:akaha. Ua biapo mande dong:chakani aro manderangni jakkalani bosturangko da:onan nikuenga. Aro uni sepangon Kanchama wari ian Bengali ku:sik "babilsu", chongmotan Renghta Rdajana mi song'e chane on:giparangna rike on:gipa nok dong:achim, ua biapkoba da:ode ganol chi joke uno wari dake dong:engaha, ua wariko Kanchama wari ming:kuenga. Unwalo uamang digi muni puako cha:mane attam sal napsrapkujaon tusipektokangaiaha. Indiba Renghta Raja an:tangde saksa mite jilgipa aro mande senggipa ong'ani gimin aro una bostu chiltimgipa chakolrangoni uko u:iatsoeming, ua aro uni mongsonggipa dilgipa Singran Chambugong Marakde joke kataha. Jinmarang aro Simjeng Marak Zaminder-rangni sipairangko so:otokaha aro uamangoni kate jokgiparangkoba Purana Putimariona kingking rikroroatokaha, aro an:tangtangni noa-namchikrangko angsilna on:giparangko rim:bapiltokaha.

Ua somoimittingo Renghta Raja an:tangni chimonggimin tangka bisil, sona rupa aro gamrangko ra'e katna man:jae uko Siltin-ni bakos (Loha)-ko chile katna man:jae uni mongma auatna kitgipa pokri Raja pokri ba Tal pokrio sildeng ka'e uni miteo pakwate galone donangaha. Ua bakosko manderang jamano saldoe ninaba ka:dongjae indaken ru:utbea salrangonan don:aiaha. Britishrangni A:chik a:songo napani jamano Turaona re:bagipa British Deputy Commissioner ua sildengchi ka'e galone donanggipa bakosko saldona badita mongmarango kae saldoatahachim indiba ua sildengsa chottome ua bakosa chiningni naprooangaiaha aro da:ona kingkingba uko darangba man:chipjaha. Ua sildeng chottomrikgipako Tal bolo ka:ako da'o budepae butchumae tangkuenggipa pagitchamrang nikriktoka inen sakkirang dong'a. Ua mongma auatna kitgipa pokri da:alona kingkingba dong:kuenga aro da:ode uko manderang raja pokri ine mingtokenga.

Rangdokram:

Rangdokram pokri ian Boldamgre South West Gari Hills Distric Bangladesh border japango kitgipa pokri ong'a. Ua pokriara uni Katchari (court) sepangon ong'a. Renghta Raja ua pokrikoba an:tangni nanganio jakkalna kitaha ine janapanirang gnang, aro je a:asanrangko (bricks) ua pokrio da:onaba man:enga uaragara Chimiteo man:gipa a:asan baksan apsan ong'aiachim.

Ua pokriko Nari Bill ineba agana, chongmotan Renghta Rajani jensomoio Nogil anti-oni kataha aro uni jamano baditaba bilsirangni jamano uni siani jamano Nogil anti-o uko bobil dakgiparangna kenaming rani ua katchariona katbae dongeaha aro ua pokriko segipako gisik ra:na ine namdapataha. Uan uni segipako gisik ra:na dakgipa kam ong'ani gimin Randi pokri ba Nari bill ming'a. Ua pokrioba Renghta Nogil anti-o uko bobil dakani ong:kataoni uni gam don:chakgipa Siltin bakos-ko sildengchi kae uni sepango dong:gipa Prab bol-o ka'e galone donangaha. Ua gam don:chakaniko darangba da:on dipetde man:kuja, indiba uni sepango Boldamgre Baptist Mondoli pokriko cho:aton unoba adita tangka bisil gitamrangko man:kuaha.

Ua pokri sepango uamangni jamano a:aniko medik samdik dakgiparang Matchi jolni manderang song:dongaha aro uamang Rang doke bangsi sike miteko uno olakkianiko dakachim unigiminsa manderang ua biapko 'Rangdokram' ba 'Randi Pokri' ine bimingko don:aha.

Bon:kame Agandapani:

Renghta Rajani golpoko sena am:sandina angna namen rakbegipa kam ong'aha, anga jensomoio Kolkata Serampore Collge-o dong:mittingo William Carey-ni segipa gitam ki:taprangko am:sandie poraimittingosa anga ia Garo Rajani gimin aditarangko nikchengaha. Jeko nika anga poraie nion uan songtang noktango atchu ambirangni aganrittingako knaonide mitamrang namen ding:tangbeachim, unigiminsa anga iani gimin nambate ma:sina sikbeaha aro 2013 mangoni anga ia golpoko am:sandikuenga. Songsaoni songgipinona am:sandianirangko aro serikanirangko nion ong:chongmotaoni badiabarang namen dingtanganirangko nikna man'a. Iano anga jerangko seaha mongsongbate John Elliot-ni Dacca-o Commissioner ong'aoniko British Governmentni A:chik a:songona, A:chik manderangni gimin am:sandina watatako man'e jerangkon am:sandie British East India Company-ni gita British Government-ona seaniko watatahachim, John Elliot,

“Observations on the Inhabitants of Garrows Hills made during a public deputation in the years 1788-1789,” Asiatic Researches, Vol.III, 1792-o pangchakbataha. Maina una skang darangba A·chikrangni gimin serikanirang dongbreja aro uarangko man·aba namen altua ong·ja, skang serikanirangko a·bachenggipa somoirango Bengali aro Assamise ku·sikrangchi seani gimin uarangko ma·sina altuja.

A·song·chigani gimin aro jatni batanggimin somoio ong·arangko am·sandie see rakkiani dong·osa chasongnaba gimajawa aro uan jatni bimingba aro gamba ong·genchim. Darang jat a·songba jatangni janggi tanganio battangimin golporang aro ong·a obostarango pangchaken jat aro a·songko, songko·noko rika, jatko bilkatna mang·rakatna batanggimin chu·sokanio maikai ong·aha namaniko ra·rike; banoba jatni dakgualanichi ong·sianiko ra·bahaode uko daktajana simsake a·song·chigako rika. A·chik jatni gimin am·sandigipa, jatni rasong aro mikkimko sandirikitgiparangko bangen nangkuenga.

Badiaba serikanirango bananrangba apsan mande aro biap ba obostarang ong·genchimoba dingtang dingtang dakanirang bangbea uarangko name nigrikchengesa uarangko dakna cholko ra·drana nangaia. Angni iano seatanirango bangbea namdatna nanganirang bangbea, maina badia golporang gipin manderangsa sehani gimin uarang an·tang jatangni maiba nangchapanirangko simsakbeesa seani gimin don·mitapanirangba bangbea. Uni gimin gisik an·ning bitgipa angni chasongska jong·ada, no·abirang saoba iandakgipa an·ching jatni gimin ningtubate gisik on·e am·sandigiparangko nangengachim. Angni seanio bangbea chu·sokgijanirang dong·chongmota uarangko indin agane roaigija uarangko angnaba agan·mesoke on·pagenchimode mitelbegen.

Angni jerangko am·kolame seaha uarangna pilak nangani somoirango angna agan·kapatigipa aro nangani somoio dakchakgipa aro didigipa dilgiparangko aro madrang mahari aro pilak ka·sagiminrangko angni gisik ka·tongonin mitelbea.
